



Grupo Provincial Socialista

Rúa Progreso, 32 – 2º andar
32003 Ourense
Tif. 988 317 972
CIF: G32244345

ÁLVARO VILA ARAUJO, voceiro do Grupo Provincial Socialista da Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, da Regulación de Organización, Funcionamento e Réxime Xurídico das Entidades Locais e o Regulamento desta corporación presenta unha **MOCIÓN PARA CONTRIBUIR Á MELLORA DAS CONDICIÓNS DAS FARMACIAS DO RURAL DA PROVINCIA DE OURENSE PARA GARANTIR A SÚA VIABILIDADE E ESTABILIDADE ECONÓMICA.**

A provincia de Ourense é unha das máis afectadas polo despoboamento no Estado español, cunha poboación envellecida e dispersa, comprendendo áreas rurais de difícil acceso. Neste senso, os establecementos farmacéuticos do rural da nosa provincia confórmanse coma un pilar fundamental do benestar da veciñanza e mesmo un vector de loita contra o despoboamento. As farmacias do rural non só garanten o acceso aos medicamentos e servizos sanitarios, senón que tamén contribúen a frear o despoboamento, melloran a calidade de vida dos habitantes e representan ás veces o único nexo co sistema sanitario nunha provincia que enfrenta importantes retos demográficos e orográficos.

A relevancia das farmacias rurais en Ourense pode avaliarse desde diferentes enfoques. Os establecementos farmacéuticos aseguran o acceso aos servizos sanitarios dunha poboación envellecida, con todo o que esta variable implica á nivel de demanda de medicamentos e atención sanitaria continuada, proporcionando un acceso de proximidade ás medicinas e asesoramento farmacéutico, evitando que os nosos maiores teñan que desprazarse grandes distancias para recibir tratamentos ou atención. Dado que os centros de saúde e hospitais adoitan estar a varios quilómetros de distancia, as farmacias convértense nun servizo esencial para os habitantes locais, actuando como puntos de referencia na saúde.

As boticas non só dispensan medicamentos e produtos de parafarmacia, senón que tamén ofrecen servizos de prevención e promoción da saúde, como control da tensión arterial, medición da glucosa en sangue, vacinación e consello farmacéutico, entre outros. Unha serie de actividades que se entoxan esenciais en áreas onde o acceso a profesionais médicos ou enfermeiras pode estar limitado, contribuindo así á mellora da saúde pública e á prevención de complicacións en enfermidades crónicas. Doutra banda, en momentos de emerxencia sanitaria, como ocorreu na pandemia de Covid-19, ou baixo condicións climáticas adversas, as farmacias rurais debeñen un apoio crucial para as nosas comunidades.

“A educación sanitaria que ofrece o farmacéutico aos cidadáns pode axudar a potenciar o seu papel no Sistema Nacional de Saúde de xeito relevante”, estima Santiago Leyes Vence, presidente do Colexio Oficial de Farmacéuticos de Ourense (COFO). Porque as boticas do rural tamén funcionan coma vencello entre os pacientes e o sistema sanitario máis amplo, facilitando a continuidade dos tratamentos prescritos polos médicos e proporcionando información sobre o acceso a outros servizos sanitarios. Nunha provincia que ten unha particular realidade xeográfica, que implica limitacións na orde das comunicacións e da loxística, isto é crucial para garantir que as veciñas e veciños poidan recibir atención sanitaria sen necesidade de desprazarse a certa distancia.

socialistaourense@gmail.com

[Facebook: PSdeGdeOurense](#)

[Twitter: @PSdeGDepOU](#)



Grupo Provincial Socialista

Rúa Progreso, 32 – 2º andar
32003 Ourense
Tif. 988 317 972
CIF: G32244345

Os establecementos de farmacia rurais tamén adoitan desenvolver un importantísimo rol social. En moitos casos os farmacéuticos son figuras próximas á comunidade, que coñecen ben as súas entornas e aos seus veciños, ofrecendo non só axuda e consello médicos, senón tamén apoio emocional. En lugares con poboacións moi envellecidas e dispersas este tipo de relacións humanas son chave para a cohesión social e o benestar xeral da poboación. Na súa condición de servizo esencial, as farmacias rurais contribúen a paliar o éxodo cara cidades e vilas. A súa mera existencia axuda a reter aos residentes, sobre todo ás persoas maiores e quen dependen de atención e seguimento médico constante, coadxuvando á sustentabilidade destas pequenas comunidades.

Das case que 1.400 farmacias que hai en Galicia, na provincia de Ourense o sector farmacéutico está composto de aproximadamente 190 unidades. As boticas están distribuídas tanto na capital e grandes vilas como nas zonas rurais. A súa capilaridade é fundamental na provincia de Ourense, marcada pola dispersión xeográfica e cunha poboación en idade avanzada. O volume de negocio do sector na provincia acadou os 109 millóns de euros en 2021, que equivale ao 11,3% do total galego en gasto farmacéutico. Porén, ducias de farmacéuticos contactados nas diferentes comarcas de Ourense e o propio presidente do COFO, “la situación da farmacia rural é crítica en moitos casos”. Á luz da súa realidade, importancia e polo ben da provincia de Ourense é importante ver de artellar medidas que melloren as condicións das farmacias, facéndoas viables e estables economicamente.

Por todo o exposto o Grupo Provincial Socialista presenta a seguinte **PROPOSTA DE ACORDO**:

PRIMEIRA.- Que a Deputación de Ourense incentive e facilite a conclusión de convenios entre establecementos sociosanitarios con necesidades de produtos médicos e de parafarmacia para que realicen as súas compras nas farmacias do propio concello.

En Ourense, a 11 de outubro de 2024.

Asinado: **Álvaro Vila Araujo**

SR. PRESIDENTE DA DEPUTACIÓN PROVINCIAL DE OURENSE

socialistaourense@gmail.com

Facebook: [PSdeGdeOurense](#)

Twitter: [@PSdeGDepOU](#)